

DECLARACIÓN INSTITUCIONAL POLO 25 DE NOVIEMBRE

Neste 2025 cúmplense 18 anos da Lei galega contra a violencia machista, unha lei pioneira e vangardista a nivel europeo que contemplou a visión da violencia contra as mulleres en todas as súas dimensións, considerándoa consecuencia do patriarcado, ampliando o seu recoñecemento máis alá do ámbito da parella e deseñando medidas integrais de sensibilización, prevención, protección e apoio ás mulleres que a sofren.

Desde entón houbo distintas melloras e puxéronse en marcha recursos importantes. Con todo, hai que recoñecer que non é suficiente, quedando aspectos desta lei que están aínda por desenvolver como son a atención psicolóxica na Atención Primaria, incremento das axudas económicas que aínda están por baixo do establecido na lei aprobada case hai dúas décadas, considerar as vítimas de agresión sexual nas axudas económicas, garantir a formación especializada das profesionais que traballan na cadea de atención á violencia machista; tomar medidas para reducir o proceso de revitimización no ámbito xudicial; mellorar o financiamento e dotación de para os CIM ou a dotación dun plan de educación afectivo-sexual no ensino público.

O Consello de Contas publica neste verán un informe no que avalía as políticas públicas da Xunta en materia de violencia de xénero no período 2018-2022. Este informe sinala que só se destina a prevención un 3% dos recursos, detecta unha redución do persoal, e a falta dun sistema público e directo de atención ás vítimas. Así, no período 2018-2022 os centros de acollida para vítimas de violencia son entidades municipais ou propiedade de entidades privadas; tan só o Centro de Emerxencias para Vítimas de Violencia de Xénero (CEMVI) é un centro propio. Da mesma maneira os centros de crise 24 horas para a atención da violencia sexual son xestionados de maneira privada.

Neste 2025 cúmprense tamén 30 anos da Declaración de Beijing. Hai que recordar que se recoñecía internacionalmente algo hoxe cuestionado abertamente, que a violencia de xénero é un obstáculo para o logro de obxectivos de igualdade, desenvolvemento e paz e que menoscaba ou impide o gozo pola muller dos seus dereitos humanos e das liberdades fundamentais. Daquela equiparábase, por primeira vez, a violencia contra as mulleres como violencia de xénero, entendendo esta como unha construción cultural susceptible de ser modificada no tempo a través dos procesos de socialización.

Nun contexto de avance e normalización das posicións negacionistas, que coincide coa defensa ultraliberal do baleirado dos servizos públicos, urxe unha resposta que aposte por máis feminismo, máis recursos e máis servizos públicos. Temos que denunciar de forma clara e directa que cuestionar o a violencia machista é violencia machista e que privatizar e dismantelar os servizos públicos resta capacidade na loita pola igualdade e contra a violencia machista.

No 2024 foron asasinadas, segundo as estatísticas oficiais, cinco mulleres en Galiza. Hoxe hai máis de 6.000 casos activos en Viogén e no que vai de 2025 houbo varios feminicidios e intentos de feminicidio en Galiza.

A violencia machista é unha realidade incuestionable, constitúe un problema de dereitos humanos e é o principal problema da vida das mulleres e polo tanto as institucións deben reaccionar reforzando recursos e servizos públicos.

Por estes motivos, a corporación municipal do concello de San Sadurniño denuncia que o negacionismo da violencia machista é unha forma de violencia machista e reafirma o seu compromiso coas políticas de prevención (educación e sensibilización) e coa prestación de servizos para o acompañamento e asesoramento das mulleres vítimas de violencia machista e as súas crianzas.

En relación ao noso compromiso queremos solicitar:

a. Que a Xunta de Galiza atenda ás recomendacións emitidas polo Consello de contas no seu Informe de fiscalización das actuacións para a prevención integral da violencia de xénero na Comunidade Autónoma no período comprendido entre 2018 e 2022 . Contribuíndo a unha rede pública de servizos que permitan afondar na prevención e na atención a mulleres vítimas de violencia machista destacando polo impacto que está a ter no noso territorio:

1. O impulso dun novo marco regulamentario e orzamentario, incrementando a súa contribución para os Centros de Información á Muller, co obxectivo de reforzar e ampliar a rede galega de CIM facendo especial énfase na creación destes centros naqueles concellos e comarcas nos que actualmente non existen ou están sobrecargados, impulsar a fixación de rateos mínimas de persoal e favorecer a contratación a xornada completa, como mínimo, de todo o persoal que sexa obrigatorio para a acreditación do CIM.

2. Asumir mediante xestión pública directa os centros de crise 24 horas para a atención de mulleres vítimas de violencia sexual e blindar a prestación deste servizo con cadros de persoal suficientes para garantir a atención presencial así como aprobar, para a súa posta en marcha no ano 2026, unha axuda periódica específica para vítimas de violencia sexual.

b. Istar ao Goberno do Estado á creación do xulgado específico contra a violencia machista en Ferrol, coa maior celeridade.

c. Manter o compromiso por parte do Concello de San Sadurniño de desenvolver cantas actuacións, na marxe do noso ámbito competencial, sexan necesarias na defensa dos dereitos das mulleres e de xeito específico das vítimas de violencia machista.